

艺术典

藝術典第四百八十三卷

醫部彙考四百六十三

痘疹門五

明方賢奇效良方 瘡疹熱與諸般熱不同

此以下論痘疹已出證

發熱證候多般瘡疹亦發熱也其體熱則同所得之由不同須引證而辨明之則各異發熱如瘡狀熱作有時者名潮熱發熱飲食不減者名風熱發熱而頭熱肚熱右額有紋者名食熱發熱而多渴渴則瀉者名疳熱發熱脣上下汗出脣中間起一白疱子及耳陰皆冷者名變蒸發熱而額正中髮際有青紋下至眉心則發驚者名驚熱發熱而皮膚或赤色熱痛時時啼叫者名丹熱發熱目閉面赤色者名胎熱發熱而面赤汗出而鼻流清涕左額有青筋紋者名傷風熱發熱而面色青慘耳鼻冷惡寒無汗亦左額有青筋手足厥冷者此名傷寒熱也又有變蒸之中偶有時行寒疫者則耳與陰反熱若瘡疹發熱則不同然呵欠煩悶時發驚悸乍涼乍熱手足時冷面目頤頰赤嗽嚏者此皆

瘡疹之熱證也

出視輕重

病有輕重藥有深淺病深藥淺不能去病病淺藥深真氣受弊觀瘡疹分輕重而治之其瘡出稀者輕裏外肥紅者輕外黑裏白者輕瘡夾疹者半輕半重也一發而出盡者重也外黑而裏赤者微重外白而裏黑太重也青乾勢陷昏睡汗出不止煩燥熱渴腹脹喘喘大小便不通者困也瘡中端黑點如針孔者紫癰也論輕重爲用藥之法輕者宜勻氣令其自出也半輕半重者宜解毒散毒則自輕也毒氣重者宜利小便太重而勢劇者當隨證滲泄熱氣衝于心則譫言妄語則硃砂參苓之類可用也蒸于肝則搖擲伏若驚癰則防風羌活天麻全蠍南星之類可用也蒸于脾則腹脹渴水大便祕目腫則枳殼散橘麴山梔地黃之類可用也蒸于肺則喘急渴水咳嗽鼻乾則桑白皮馬兜鈴半夏之類皆可用毒氣歸腎而黑麤倒入者宜猪尾膏活血散皆可急而用之也又有風邪客搏於皮膚熱不得泄瘡變爲癰疹之狀皮膚瘙癢者則輕又有內先蘊熱外被風邪相連搏於血則赤斑其毒亦深傷寒變瘡痘者其傷寒熱毒甚而發胞瘡其瘡也或白或赤發於皮膚頭作漿戴白膿者

輕有紫黑作根隱隱在肌肉裏者其毒必甚重者五內七竅皆有瘡其形發如豆故以名焉大抵正瘡痘是母腹中時受積穢良由內實而斑毒生其感風感寒爲癰疹爲斑毒爲痘瘡皆外邪乘內虛而伏於臟腑內外皆熱熱蓄血聚壅遏不行蘊結而成也所遇之初不同可不辨正之瘡子內實而生者五臟各有一證前篇備論之矣且傷寒傷風何以別之面青四肢微厥無汗而惡寒耳與陰皆熱者傷寒也傷風者面赤四肢煩鼻流涕有汗惡風此一者宜審早早治之不爾爲瘡疹也若在母腹中蘊毒氣者千金方云兒初生以生地黃汁一蜺殼與服便下黑糞佳及瘡疹臨發未出之間以升麻湯解之冬溫以三豆飲子解之時氣發瘡疹恐相傳染以茜草煎汁解之此皆瘡痘當用者惟傷寒傷風變爲瘡痘是汗下失時之過

疏利與取轉不同

瘡疹已出熱毒居表而不可疏利疏利是未出時卽疏利之疏則散其熱氣利則滑其肌竅使熱毒則發泄而不壅遏其瘡疹輕而易出也及其瘡疹已出卽不可疏利宜以和平勻氣藥調理爲宜又曷嘗令人取轉耶且疏利與取轉相去遼遠疏利者是以輕涼之藥疏散使易出也如黃連散青黛

散當歸散煩躁睡臥不安頻煎豆湯徐徐服之取轉者是以峻快之藥轉下也如巴豆芒硝輕粉水銀之類是也疏利與取轉輕重殊等不可同日而語古言疏利今乃爲取轉得不爲誤耶

辨董汲指迷方論與錢氏活人書不同

小兒所稟有虛有實病證有寒有溫故良工隨宜而治各得其所今觀董汲與指迷方論其稟氣厚者或病熱而又失於解利有蘊積熱毒者治法則當利利之無不愈此由小兒稟氣已厚又有病熱而失於解利蘊熱在中則宜利之利之無不愈矣此董汲指迷用藥之意皆熱毒未出於表蘊毒在裏時用之也若無錢氏方活人書用藥之意錢氏論倒壓欲脾強勝腎得身溫而渴陽氣復者可生也活人書云身熱耳冷尻冷輒用利藥則殺人二人之論身熱爲瘡疹毒以在表氣虛在裏故不可利但以溫平解毒而已故知傷寒身熱而下之早毒氣入裏爲結胸瘡疹爲熱若表下之早爲黑廔爲陷伏四人之論皆不可廢用之要得其宜後之醫者當以董汲指迷方治瘡疹未出預截熱毒若已出了者解利餘毒則無不愈矣以錢氏朱氏之意治瘡疹正作使外不至太過裏不至陷伏亦無不愈者大抵治病皆當隨宜用之最爲要法譬如小兒患有傷冷者有伏熱者有被驚者有感風寒

者有傷食者臨期分別豈可泥於一曲況習醫者又隨方而用之以愚觀之昧者徒互見其偏審之四說皆爲可用

方宜不同用藥亦異

素問云一病而用藥各不同皆愈者何也此地勢使然爾且東方食魚而嗜鹹令人黑色而粗理爲病癰瘍以砭石治之西方風土剛強外邪不能傷其病生於內治之宜於毒藥北方風氣冰冽臟寒生滿病其治宜於灸炳南方天地所長養陽盛處其地下水土弱而霧露之所聚其民嗜酸而食胘病爲癰痺治以微針中央地平以濕其生萬物也衆食雜而不勞病爲痿厥寒熱其治宜於導引按蹻是以五方地勢高下不同治法亦異故仲景治傷寒用桂枝麻黃大青龍湯皆是熱性藥云西北二方行之無不應驗惟江淮地煖處用如減法如升麻石膏知母之類是隨此五方地氣而用藥也又云病素有虛實者並用古方不在加減法當此隨時變通不可泥於一曲且西方風土剛強外邪不能襲病生於裏其治宜毒藥利之設有陰證者亦須用理中湯四逆湯之類以助陽氣南方雖爲陽精拱上其地下水土弱霧露之所聚病爲癰痺設有陽證者宜用大黃大青黃連葶藶苦酒之類

以復陰氣也此皆前人得隨時增減之理則知瘡疹豈在專補專瀉但應當日脈證祛逐可也方宜各自不同故用藥豈可執泥哉

戒失飢不可當風冷

人之飲食起居有消息虛實存焉且晝日起居行坐其氣血漸降也夜則倒眠血氣漸升則心安而逸也此上下升降虛實運動也且人之胸腹方其飢也則腸實而胃虛及其飽也則胃實而腸虛此平居飲食進而無病尙且一起居一飲食而一虛一實存焉況小兒在母腹中所蘊穢毒在臟腑欲出爲裏熱熱甚而發於外其熱暴出其裏暴虛正賴飲食湯藥以助之苟或失飢內無食以助胃何以運出其瘡痘則爲黑靨陷伏者多矣此內虛所致也故不可失飢者此也又瘡疹正出乃表實裏虛心煩惡熱而欲冷或起居當風或失蓋覆則虛熱被外風寒所搏而爲陷伏者亦多此外邪所致視瘡疹者可不謹歟

大熱當利小便小熱當解毒

前人論瘡疹有大熱則當利其小便蓋大熱則皮熱脈實大小便皆不利心熱而渴氣滿而喘能食

不結膿血痂疔當此裏熱既盛懼其生他疾故利小便心火有所導引雖不用冷藥熱亦自減去矣
可待其瘡疹至熱過不爲冷悞尤爲良法其小熱則解毒蓋小熱不解大熱必生小熱而利小便則
損氣當此有小熱不可利小便但解熱而已如玳瑁湯獨勝散安斑散如聖散紫草湯犀角飲此雖
不利其小便其熱亦不能爲害當思前人云大熱者方利其小便有小熱者尙不敢利其小便恐致
損氣彼其妄下者可不愧乎

小便赤澀心腹脹滿

因瘡疹伏熱在胃則中有所隔上則心火不降故小便赤下則陰氣不能升故爲心腹脹滿董氏紫
草散發出其毒胃中熱散自然冰釋詳其藥味以紫草發散以黃芪定痛解毒生肌以枳殼治腹脹
令大腸不祕氣通消脹以木通導心熱而利小便以甘草和之古人用藥必有至理焉可以意推之
先利而後出但解毒不可再利

飲食芳味雖能益人用之過亦能害人況烈毒慄悍之藥又在已下之後豈可再利之此五臟不可
再傷故也蓋瘡疹未出已曾先利之今瘡疹始出則內無壅滯熱毒縱有亦輕矣故云曾經下後惟

有熱者但解毒其熱亦庶幾矣大抵瘡疹不經下亦有內虛者當勻氣安養之又況曾下而後瘡疹出若又下之是重虛也

煩躁而渴

心經有熱則煩躁脾臟津液少必口燥咽乾而渴也瘡疹已出未出皆宜用甘草散若心煩發渴大便不通小便赤滯者宜服通關散煩而喘悶燈心湯主之夏月天氣大熱夾暑煩躁熱渴大便秘而小便赤者白虎湯加人參煎服之虛煩發躁而渴小便不利者五苓散酒蒸黃連丸皆要藥也宜擇而用之

睡臥不安

陽氣勝而陰氣少則煩而躁甚則蘊心悸動不能安矣故身熱煩躁睡臥不安但清心利小便則自然安適若表不解身熱而煩躁睡臥不安者服冰解散或結糞大便秘而煩躁不得眠者必腹脹手掌心腋下汗宜服麻仁丸或煎黑豆徐徐飲之甚者青黛散以水調服惟津液枯少虛煩之氣晝夜不得眠者酸棗二湯爲良也

狀如蚊蚤所嚙毒盛色黑

瘡疹陷伏虛實不同宜詳辨之有胃寒營衛氣虛而陷伏者則肌膚慢瘡癰皆白不欲食或嘔大便下祕小便瀆白者此皆宜溫之活血散人齒散胃愛散虛寒甚而至於自利間亦可用雖附子理中豆蔻亦可用瘡出爲期又有毒氣內外壅遏熱蓄結聚而不散毒氣壅瘀於肌膚急出不得壅於毒氣倒靨黑色蓋血活如硃砂如鷄冠色若毒瘀血聚則黑色又如蚊蚤所嚙而黑色者由毒氣暴出瘀熱搏之故血凝而不得出爲黑靨其證最惡其大小便秘腹脹滿喘急煩躁者宜用山梔子湯宣毒膏治黑瘡子患候無比散毒氣內攻紫黑色出不快者莊氏云斑瘡倒靨而黑色者謂之鬼瘡子宜獷猪尾血調腦子佳

悞服涼藥冰伏

小兒胃熱出斑瘡蓋胃者主一身肌肉其胃中熱則身熱身熱太甚斑毒得出胃熱既出其裏已虛合以和平藥調助之又有醫者及病家未明乎此見其熱便用涼藥是裏無熱又加冷藥則裏稍寒使瘡子不能出也凡有熱則氣散有寒則氣斂使肌膚急而腠理祕固瘡子輕者爲出遲重者爲倒

麝可用胃愛散以溫之胃氣既復得溫營衛復行則出矣故胃愛散以脾胃生寒而用之

便血糞黑睡而不醒

瘡子當出而不出者此由毒氣當散而不散也蓋心主血而營於血瘡疹不出毒氣蘊瘀於裏則爲便血黑色故神昏睡而不醒其證甚惡脫殼散犀角地黃湯主之

已出而腹脹

瘡疹已出而腹脹者何此陰陽不和也此毒氣陷伏入裏也二者緣毒氣已出而未盡又正熱或外傷寒而內傷於冷也大抵瘡毒正作熱毒蘊積則多渴煩躁而引飲又或投涼藥或飲冷水故熱被冷激而不能蒸出冷氣內拒而不能消化其冷熱毒氣相搏於裏則不消令人腹脹氣喘甚者發寒肢厥瘡癰白而無血色或至不救急宜以溫中藥逐冷氣冷氣散則腹脹亦消昧者一見腹脹莫不更增宣瀉是謂重困蓋傷於冷者必不能食大小便利時時下氣此傷冷陰陽氣不和也又有毒氣陷伏入裏者瘡疹出遲毒氣倒壓亦令兒腹脹亦宜用溫平解毒快氣藥如人齒散活血散之類服之大抵毒氣伏入者必有熱證相雜或渴或煩躁或大小便赤澀或啼哭不止者則陷伏黑麝證中

具詳若腹脹目閉口中如爛肉臭者其證惡此爲難治

當下當救裏

瘡子半出半不出此毒氣半在裏而不出盡故也或盛出大便不通小便赤澀喘竊腹脹而齒唇乾口燥引飲譫語者當急下之此由毒氣彌盛而內外皆熱若大便裏急後重者當令大便潤過內不燥不裏急後重腹不脹者且利其小便又有瘡子半出半不出下利四肢厥逆腹脹噦此由裏寒毒氣不能出故宜以薑附理中等藥急溫之一則言當下者恐毒氣復入故也一則言宜溫者恐無胃陽以行營衛虛實之勢劇也故二者俱不可廢

既下懼太早

夫病有遲速藥當隨應而用可以速則速可以緩則緩如響應桴聞不容櫛且瘡疹始出未有可下證但以和平藥調理之乳食飽哺之避風寒以溫之三者皆爲保子之常法如瘡疹見而三五日尙未出者可微發之微發不出則大發之大發之出不多脉息平和無他證者卽瘡本稀不可更表散也今人纔見表不出熱又不退必便下之其內虛瘡子將發者則因利而不出瘡子已出者必復陷

陷必黑黧瘡子歸腎此爲脾土弱而腎水反勝錢氏以百祥丸下膀胱毒則脾土自實瘡痘可以復出與其下膀胱毒於黑黧之後莫若正脾土於未出之先則不下爲愈是風與熱證皆可下今見熱而卽下故不可也況下之縱愈亦有三證一爲疥癬二爲痘癰三爲目赤有此證者皆下之失於早不可不戒故前人論曰瘡疹未見乃可疏利是熱毒未形容間毒在臟腑則預下之也又牛黃丹證云瘡疹出定大便不通令膿汁不乾者可下之以此觀之當下證是未出之前及已出定之後非正出而可下也且利毒丸雖治胃熱瘡疹欲出溫壯腹脹氣粗大小便赤澀煩渴舌乾睡中驚而厥脈沉大滑數雖名利毒丸利其邪熱況用大黃大黃性利毒解表故傷寒當利亦用之又通關散證云治患瘡疹心躁發渴便赤口苦生瘡用木通瞿麥滑石皆利小便藥也二方皆謂大小便熱爲害甚則去其熱毒氣苟不用之又爲失下之害故用之豈是瘡疹正出而下之也故下之者不可太早

誤下證

傷寒身熱固不可下瘡疹熱亦在表尤不可轉下者蓋熱毒已在表故也活人書云小兒身熱耳冷尻冷咳嗽輒用利藥必毒氣入裏則殺人蓋熱在表則表實而裏虛故身雖熱裏無可下證而便下

之則裏無陽以應表至於陷伏而死者多矣大抵瘡疹血氣順脾胃溫則易發若裏無熱而誤於疏轉則令氣弱血澀脾冷營衛無以運化而毒氣難泄立見危殆尤當審辨又況小兒鼻塞唇焦內伏熱也脉細而色痿黃或青色皮膚又慢口吐清涎者此誤下證也或服涼藥太過或裏無熱壅滯則不可下也

瘡疹有當大便過有當溫有當下

此以下論瘡痘已出後復生他疾

夫瘡疹傷寒風熱傷食諸證身有熱者如大便四五日或六七日不通者須用少藥令潤過非取峻快之意亦有外證參之須仔細辨認爲宜如仲景云陽結陰結大便秘者至十四日十七日方劇苟若至十四日十七日因有他病損耗津液而無結糞腹不脹不裏急後重則不可攻之蓋腸無結糞故也今言六七日令潤過氣升降則身熱者不生他疾緣小兒純陽身熱而大便不通者易實大便自利者易虛易生他疾當調令大便如常最爲候臟腑虛實之要法也雖然大便秘非一證有風祕有氣祕有熱祕虛祕冷祕用藥當細辨也且人能食大便不通結澀如下栗塊者風祕也煩躁飲引

小便赤而大便秘腋下手掌心有汗者熱秘也腹脹腸中虛鳴胸脅不利者腰腹引痛者氣秘也嘔吐清水不能食面青而瘦冷秘也或久病不能乳食腹不脹不裏急後重雖久不大便者虛秘也凡此五秘者當隨證治之若大便如常且不可以冷藥與服恐水注胃脉營衛不行則瘡疹亦不出矣又有患至五七日自然瀉者須用如理中丸等溫腸胃藥若瀉住卽止後服亦不可過熱此是當下當溫之證又有瘡疹出正盛喘粗氣急腹脹小便赤澀手掌心并腋下有汗或睡中譫語大便不通者用四順飲子得氣通喘定腹不脹則已之下之瘡紅快者更不須通也

或吐或瀉或不食

瘡疹之證或吐或瀉或不食者此由脾胃虛弱也小兒胃熱出斑瘡大抵瘡疹多出於胃緣熱毒方作之際必多煩渴燥熱引飲或於風寒處坐臥遂令冷熱相搏冷氣入胃故令胃冷則吐脾冷則瀉脾胃皆虛則不食也當以治中益黃等隨證與之甚者隨宜增減以吐利止爲度又有熱吐熱瀉則不同何以別之蓋熱吐者手掌心并腋下熱而澀澀有汗發渴而臉赤喜飲冷未能言而渴者則一向飲乳聚其飲乳滿於胸臆不能消化吐出時是熱吐也熱吐了又急欲食乳是內熱而渴但不能

言其渴醫者不審見吐利便用燥藥熱極生風者害人甚衆非特瘡疹有此他證亦不用此分熱吐熱瀉尤審熱瀉者小便赤澀而渴口燥咽乾皆當用五苓散竹葉半夏湯主之小兒不食亦有虛實二證或吐或利面青而目睛青黑色而不食乳者爲虛寒而不食也宜溫之大小便如常面赤而壅或渴或睡中驚或咬齒目白睛黃赤或氣喘或身熱而不食乳者此爲實熱中滿而不食乳也猶如伏熱者亦不思食胸膈滿悶故也尤宜詳審

瘡疹皆多在表不可妄下

傷風與寒以汗解汗者穀之精氣也瘡疹作膿血痲痧膿血痲痧血也古人以解利藥如升麻湯之類皆懼其血熱毒甚則瘡疹尤甚故少涼血以解其毒瘡疹亦易於將理何嘗以轉瀉傷其臟腑脾胃也蓋臟腑脾胃既寒何以運行營衛營衛既遲瘡疹膿血痲痧何以蒸成故知傷寒則氣行汗出而已尙不可下況瘡疹在血氣溫厚內不虛而外不寒則出而不伏陷矣胡不觀內補散治癰疽至驗皆是煖血行營衛藥今瘡疹與癰疽皆瘡也何嘗以轉瀉治癰疽也

陷伏倒靨

瘡疹陷伏倒靨方書稱倒靨而已殊不知內虛不能盡出者爲陷伏外被風寒所迫或被惡氣衝觸而不得出者名倒靨然得之有始末輕重不同若一槩用藥因茲天橫者多矣蓋瘡疹已出斑點爲始以血疱爲中以結膿窠痂疔爲末三者淺深不同烏得不論夫既出斑點爲始者臟腑蒸蘊毒氣內外皆熱數日既熱甚蘊斑毒於肌竅出於皮膚亦有陷伏亦有倒靨斑點始出外被風寒所感使肌竅復閉血凝澀而不行必身疼四肢微厥氣血盛實與風寒相搏於肌膚必大小出祕斑點不長或黑色或身生青紫癰疹此爲倒靨也當此可溫肌發散風寒如紫草蟬蛻陳皮葡萄人齒蠶蠶荷葉之類溫散寒邪然後熱氣復行則斑出矣有胃虛而不能副營衛者雖出而復沒故斑運白色或黑色此內虛所致故出而無血氣以應之其人必不能食乳或大便自利小便不赤而清或倦或嘔四肢微厥其由內胃既虛自不能出此爲陷伏也當此宜用溫辛之藥令其胃煖營衛復溫必自然出矣如理中湯活血散人齒散之類以溫之吐利甚者須薑附硫桂亦可用此治內自虛而陷伏者也若以血疱爲中者是紅斑出之後至足有斑爲齊斑疹毒方出盡也自斑點生如豆起於肌膚之上所以血疱爲中者未結膿血痂疔之前證也血疱七日當結膿血痂疔當此或外被風寒所感爲